



*Iesus estant interrogé sur le payement du tribut de Cesar, rend
les Pharisiens confus.*

LES Iuifs voulans surprendre Iesus-Christ en ses paroles, enuoyerent des espions Pharisiens & Herodiens, qui feignoient estre iustes, pour le liurer en la puissance du grand Gouverneur; & afin d'y paruenir ils l'interrogerent, disans: Maistre, nous sçauons que tu és veritable, & que tu enseignes la voye de Dieu en verité, & ne te soucies d'aucun, & sans acception de personne, tu parles droictement. Dy-nous donc, s'il est licite de donner le tribut à Cesar, ou non? Le donnerons-nous, ou si nous ne le donnerons point: Et Iesus sçachant leur cauteleuse malice, leur dist, Pourquoi me tentez-vous, hypocrites? montrez-moy la monnoye du tribut; & ils luy presenterent vn denier, & le voyant leur dit, de qui est cette image, & la superscription d'icelle; & ils luy dirent, C'est de Cesar. Lors il leur dist, Rendez donc à Cesar ce qui est à Cesar, & à Dieu ce qui appartient à Dieu. Oyans cela ils demeurèrent confus deuant le peuple qui s'émerueilla, & le laissans s'en allerent.

S. Matthieu Chap. 22. S. Marc Chap. 12. ̄ 13. S. Luc Chap. 20.